



Deutscher Sprüchwörter. 204

phia/gegē dem Franzosen sich lägerte/her
re erliche des frantzosen Rāth im angezeigt/
er solt sich fürsēhen / vñ das geringe volck
nit vachten/dañ es weren die alten kriegß
leut vorhandē/Herr Jörg vō Fronßberg/
Herr Marx Sittig vō Lēnden/ vnd Graf
Niclas von Salm/Keyser Maximilianus
discipel/die wurdē es/wo sie ein wenig jrē
forteil sehen/gar frisch vnd dapffer mit im
annemen vñ wagen. Hetten die geschwie
gen/der Franzosß vñ die seinen hetten viel
leicht mehr muts vñ siegs gehabt dan also.

Es ist hochberümpft des Cecili Metelli
antwort/die er gab einem jungē sändrich
vnd kriegßgurgel/der in fragt/ was er für
nemen wolt/da sprach er / Vñ wañ ich wü
ste das mein kleid dz ich an hab/wüste mei
nen anschlag/ so wolt ichs bald außhun/
vñ in das sewr werffen. Also ist ein zeit zu
reden/vñ ein zeit zu schweigen / wie Salo
mon sagt/selig ist der/der sie treffen kan.

309

**Wer vntrew ist/der glaubet vnd
vertrauet niemandt.**

Ein jeder richtet den andn/nach dem er
gesinnet ist/wie droben gesagt. Freydanck.

Ein falsch Mann von natur muß han/
Zu allen zeiten bösen wahn.

c iij